

## **Erich Bolinius**

Bericht über Kickers Emden

Sendung „Flutlicht“ auf Radio Ostfriesland

Donnerstag, 8.9.2011 18.00 Uhr auf 94.0 bzw. 87,7

Moin, leev Toehörers,

all de 607 Toekiekers, de lesd Sönnndag in dat Oostfreesland-Stadion in Emden hemmen sük fraagt, wat was worden, wenn Kickers de Elfmeter an Anfang van de tweed Halvtied rinskoten harr? Toe disse Tied stunn dat 2:0 för Osnabrücks 2. Mannskupp. Wall Steven Janssen aber an Osnabrücks goed Torwart Nils Zumbel de Ball neet vörbi kreg, blev dat bi de Vorsprung för Osnabrück. Later gungen de Jungs mit ´n 3:0 as Winner van d` Platz.

Un ik mutt seggen, dat de Sieg van Osnabrück hoog verdeent was. De Jungs van Trainer Joe Enochs was in all Belangen Kickers klaar overlegen.

Na ´n Freetrapp för Kickers konterte Osnabrück over Paddy John, de Ruben Gonzalez utstiegen lett un de genau up sien Mitspöler Gerrit Freudenberg passt - un de skütt de Ball in Tor. Dat was in de 33. Menüte. Dorna harr Kickers de eentigst groot Kans in de 1. Halvtied dör Andreas Gerdes-Wurpts. Sien Skoet was wall goed, man de Torwart was noch beter.

Kickers kwamm nu beter up. Man dat Tor skoot Osnabrück dör Chrisitan Pauli, de van de Straafruungrenz Kickers-Torwart Sebastian Patzler in de 40. Menüte keen Kans leet.

In de Halvtiedpaus see Kickers-Fan Bernd Weise an mi, dat ik mit mien Tipp all dortegen liggen dee. He aber mit sien: een 2:2, noch recht behollen kunn. Man Fleitjepiepen, dorut wurr ok nix. As wi van uns Platzen gungen, um in de Halvtiedpaus ´n Beerke toe drinken, see ik toe ´n Osnabrücker Fan, de tegen mi satt um hum ´n bietje toe argern: „Joe Mannskupp kriggt noch ´n paar Ballen in ´t Tor. Eerst lesd Week hemmen se ja 6 Stück infangen.“

Antwoord hebb ik van hum neet kregen, wall was ´n bietje anstoken.

Na de Paus wull Kickers dat aber weten un harr ok ´n paar moi groot Kansen. Thilko Boekhoff setteste de Ball ut halvlinks an de Querlatt In d` Straafruum word Aaron Thalmann fast hollen, as he versöchte, an de Ofpraller toe komen. Schiri Dirk Schröder wees glik up Elfmeterpunkt, man Steven Janßen kann de Ball neet in ´t Nett unnerbrengen.

Ok Joe Enochs, Amerikaner, see na ´t Spöl: „Wenn de Elfmeter ringeiht, dann kriegen wie Riesenprobleme“.

In de 69. Menüte was dat dann vör Kickers heel un dall ut. Ismail Budak skoot dat dart Tor för Osnabrück in ´t rechte kört Eck. De Ball harr Kickers Torwart Sebastian Patzer na mien Menen hollen musst. Dorna gung Kickers heel un dall unner. ´n paar Toren harr Osnabrück in de verbliene Tied noch sketen kunnt.

Sükse Spölen giff dat immer weer. Sönnndag tegen Nordhorn kann dat all weer heel un dall anners utsehn. Drücken wi Kickers Emden beid Dumen, dormit se dor winnen un in de Tabell wieder na boben gahn. Denn de 5. Tabellenplatz mutt in disse Saison drin wesen.

So, nu noch, as alltied, ´n kört Foetballwitz.

´n 15-jährige B-Joegspöler seggt tegen sien Frünnen: „Ik weet wall, wo man dat nöhm, wat ik güstern mit Rika in hörs Huusflur maakt hebb, aber Foetball könt ji in de komende Tied eerstmaal ohn mi spölen.“

So leev Toehörers van Radio Oostfriesland,

ik hoop, Joe hett dat Plattdütsk gefallen, denn mien Motto heet ja alltied, plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.